

## **01.10.2008. Govor za MO BiH prilikom dodjele plakete uvaženom Gordonu Englandu, zamjeniku Sekretara odbrane SAD-a**

Sekretaru England,

Veliko mi je zadovoljstvo i čast poželjati dobrodošlicu vama i vašem timu danas u Sarajevu u ime Ministarstva odbrane i izraziti poštovanje i iskrenu zahvalnost Bosne i Hercegovine za stalnu pomoć Sjedinjenih država i njihovog Odjela za odbranu, te vašu osobnu podršku i prijateljstvo koje je rezultiralo u odličnu i uzajamnu produktivnu saradnju.

Obim i sadržaj saradnje je ogroman i jako važan za Bosnu i Hercegovinu, no ja ću istaći samo neke od njenih glavnih osobina i postignuća.

Mir i stabilnost u Bosni i Hercegovini mogli bi se očuvati i dalje razvijati predanim nastojanjem svih političkih subjekata unutar BiH i kontinuiranom pomoći međunarodnih partnera.

SAD su ključni igrač u očuvanju globalnog mira i stabilnosti, što je najbolje pokazano njihovim snažnim angažovanjem da podrže našu zemlju u ovom nastojanju.

Zamjenik Sekretara odbrane SAD-a, uvaženi Gordon England, lično je uvelike doprinio i uložio izuzetan napor da bi olakšao pozitivne procese u Bosni i Hercegovini.

Zahvaljujući odlučnim vojnim i diplomatskim akcijama SAD-a, tragični rat u Bosni i Hercegovini je završen, ali ostalo je mnogo izazova u izgradnji mira i obnovi države.

Međutim, nismo ostavljeni sami. Administracija SAD-a preuzela je vodeću ulogu u pomaganju Bosni i Hercegovini da započne reforme potrebne za uspješno „koračanje“ kroz poslijeratnu obnovu i ponovnu izgradnju veza potrganih u ratu.

Iako je pomoć SAD-a bila jako važna u obnovi osnovnih infrastruktura, ekonomskom oporavku i povratku izbjeglica i raseljenih lica u domovinu, kao ministar odbrane Bosne i Hercegovine, želio bih osobito istaknuti ulogu koju su SAD odigrale u podržavanju procesa reforme odbrane.

Reforma odbrane nije samo opsežno najveća i najobuhvatnija reforma u BiH od Dejtonskog mirovnog sporazuma, nego je proces koji obuhvata promjene svih aspekata našeg društva, uključujući mentalitet, te stvaranje pozitivnog primjera za rješavanje budućih izazova na našem putu prema integracijama u NATO i EU.

Administracija SAD-a prepoznala je dalekosežne učinke reforme odbrane i osigurala je svu neophodnu političku i materijalnu podršku, potvrđujući još jednom svoje prijateljstvo i snažno angažovanje za Bosnu i Hercegovinu.

Kao visoko rangirani dužnosnik Administracije, uvaženi Gordon England podržavao je reformu odbrane kao snažan vođa i pouzdan prijatelj.

U decembru prošle godine, g. England je u Wašingtonu D.C. bio domaćin prvim razgovorima između bosansko-hercegovačkih i američkih predstavnika iz resora odbrane, kao i plenarne sesije na kojoj su sudjelovali ministri odbrane druge dvije susjedne zemlje članice PFP-a, okrećući na taj način novu stranicu u našem bilateralnom odnosu; stranicu partnerstva i uključivanja u evro-atlantske integracijske strukture.

Bosna i Hercegovina je ponosna na svoj trenutni doprinos međunarodnim operacijama podrške miru, što nam je, još uvijek u maloj mjeri, pomoglo da se premjestimo sa uvoznika na izvoznika odbrane i sigurnosti. Učestvovanje u operacijama podrške miru postalo je takođe moćno sredstvo za transformaciju našeg odbrambenog sistema u NATO-ovu odgovarajuću strukturu, sposobnu za provođenje misija u najzahtjevnijem međunarodnom okruženju.

Zahvalni smo Vladi SAD-a, osobito Odjelu za odbranu i vama g. England što ste implementaciju Jedinice za uništavanje NUS-a i Pješadijske jedinice OS BiH u Iraku učinili mogućom i uspješnom.

Nakon što krajem ove godine ostvarimo naš doprinos operaciji „Iračka sloboda“, Ministarstvo odbrane BiH i Oružane snage nastavit će doprinositi drugim međunarodnim operacijama podrške miru. Pripreme za implementaciju prve grupe od 10 oficira iz BiH za operaciju pod NATO-ovim vođstvom u Afganistanu već su započete.

Bosna i Hercegovina ima pozitivna očekivanja i nade za budućnost, i nastavit će svoj put prema zajednici razvijenih i demokratskih naroda kroz stalni progres u provođenju reformi.

Značajan presedan na ovom putu jest prošlonedjeljna odluka Vlade SAD-a da pozove Bosnu i Hercegovinu da se pridruži Američko-jadranskoj povelji. Mi ovaj korak ne vidimo samo kao priliku za buduću saradnju sa ovom regionalnom inicijativom pod sponzorstvom SAD-a koja će rezultirati u potpunu integraciju BiH u NATO, već kao znak stalnog angažovanja i prisutnosti SAD-a u našoj regiji.

Na kraju, dopustite mi da iskoristim ovu priliku da pohvalim Američku ambasadu u Sarajevu koju predvodi odani ambasador English, kao i Ured atašea za obranu, Odjel za odbrambenu saradnju i da zahvalim svima njima za doprinos u dovođenju naše bilateralno-odbrambene saradnje na nivo na kojem je danas.

Velika plaketa koju vam želim uručiti g. England, samo je mali znak poštovanja i zahvalnosti dragom prijatelju koji je odigrao tako važnu ulogu u ovom velikodušnom nastojanju podržavanja Bosne i Hercegovine i cijele regije u njihovom procesu transformacije u područje trajnog mira i stabilnosti.